

Aleksandar Trajkovski

Gdje poslije
SMRTI?

Tumačenje priče o bogatašu i Lazaru



Aleksandar Trajkovski

Gdje poslije smrti?

Novi Travnik, 2014

Kršćanska baptistička crkva, Novi Travnik
www.kbent.net
Info@kbent

Gdje poslije smrti?

Gdje ide čovjek poslije smrti? Jedni će reći da ide u grob, drugi da se reinkarnira, treći da ide u čistilište, četvrti da ide u pakao, peti da ide u raj itd. Međutim, malo ko će posvetiti više vremena da razmišlja o ovom pitanju. Mnogima je važnije da znaju šta će biti danas ili sutra, ali vrlo malo ih zanima šta će biti s njima kada umru. Jedan od razloga što postoji nedovoljna zainteresiranost za zagrobni život jesu nejasna i prilično različita učenja koja se mogu čuti o toj temi. Ja bih želio da naučimo šta se stvarno dešava nakon smrti. Izvor spoznaje će biti riječi Isusa Krista zapisane u Bibliji. Evo šta Isus kaže:

Bijaše neki bogataš. Odijevao se u grimiz i tanani lan i danomice se sjajno gostio. A neki siromah, imenom Lazar, ležao je sav u čirevima pred njegovim vratima i priželjkivao nasititi se onim što je padalo s bogataševa stola. Čak su i psi dolazili i lizali mu čireve. Kad umrije siromah, odnesoše ga anđeli u krilo Abrahamovo. Umrije i bogataš te bude pokopan. Tada u teškim mukama u paklu, podiže svoje oči te izdaleka ugleda Abrahama i u krilu mu Lazara pa zavapi: 'Oče Abrahamo, smiluj mi se i pošalji Lazara da umoči vršak svoga prsta u vodu i rashladi mi jezik jer se strašno mučim u ovom plamenu.' Reče nato Abraham: 'Sinko! Sjeti se da si za života primio dobra svoja, a tako i Lazar zla. Sada se on ovdje tješi, a ti se mučiš. K tome

između nas i vas zjapi provalija golema te koji bi i htjeli prijeći odavde k vama, ne mogu, a ni odatle k nama prijelaza nema.' Nato će bogataš: 'Molim te onda, oče, pošalji Lazara u kuću oca moga. Imam petero braće pa neka im posvjedoči da i oni ne dođu u ovo mjesto muka.' Kaže Abraham: 'Imaju Mojsija i Proroke! Njih neka poslušaju!' A on će: 'O ne, oče Abrahame! Nego dođe li tko od mrtvih k njima, obratit će se.' Reče mu: 'Ako ne slušaju Mojsija i Proroka, neće povjerovati sve da i od mrtvih tko ustane.' (Lk 16:19-31)

1. Narav teksta

Prije nego što pomnije pogledamo Isusove riječi moramo se zapitati o samoj naravi priče, odnosno teksta. Radi li se o nekom mitu ili legendi koja ima malo ili nimalo veze s istinom ili o stvarnom događaju? Mnogi na ovaj tekst gledaju kao na usporedbu.

Priča sasvim jasno govori o raju i paklu kao konačnim odredištima umrlih. Takvo učenje se mnogima ne sviđa i svim silama žele umanjiti značaj teksta. Misle da će to postići tako što porijeklo priče traže u egipatskim mitovima ili o njoj govore kao o usporedbi. Zaključite li da je ova priča usporedba onda si daju za pravo da zanemare njezina jasna učenja.

Ja ne mogu drugačije nego da na ovu priču gledam kao na Isusovo prepričavanje istinitog događaja. Nemam nikakvih valjanih argumenata da na tekst gledam kao na mit, legendu ili usporedbu. Ovo je stvarni događaj koji nam Isus prepričava. Likovi u priči su stvarni i njihov završetak je stvaran.

Neki kažu: *Zar će Bog ljubavi ljude baciti u pakao? Ili: Kako oni iz pakla mogu razgovarati s onima u raju?* Postavljajući ovakva pitanja misle da su dokazali kako priča nije u potpunosti istinita. Pitanja su dobra i možemo ih postavljati, ali pitanja su pitanja, a ne dokazi, a dokazi za negiranje bilo kojeg detalja u priči ne postoje. Ako Isus kaže da je bilo tako, a kaže, onda ne može biti drugačije. Isus priču započinje riječima: *Bijaše neki bogataš...* Ako Isus kaže da bijaše, onda bijaše, i sve što Isus kaže o njemu jeste istina i ništa drugo.

2. Kontekst.

Ukratko ću se osvrnuti i na kontekst koji pokazuje zašto Isus govori ovu priču. Vjerujem da šesnaesto poglavlje Evanđelja po Luki ne možemo razdvojiti od petnaestog. U petnaestom poglavlju Isus se susreće s farizejima koji su negodovali na to što se on druži i jede s grešnicima. Kako to da se jedan učitelj druži s takvom vrstom ljudi? U istom poglavlju, Isus ih poučava da Bog voli grešnike i radije se kada se neki od njih obrati. U šesnaestom im dokazuje da su i sami grešnici. Sebe su držali pravednima i mislili da imaju pravo prezirati druge. Isus razbija njihove iluzije tvrdeći da su i oni obični grešnici koji vrlo vjerovatno svoju karijeru mogu završiti u paklu. To je i svrha (ili jedna od svrhi) ove priče o Lazaru i bogatašu.

Možda misliš da si dobar i pravedan i prezireš druge? Nadam se da ćeš nakon čitanja promijeniti mišljenje.

3. Lik bogataša

Neki liku bogataša daju ime *Dives* što na latinskom znači *bogataš*. To je čovjek koji je svoju zemaljsku karijeru završio u paklu usred strašnih muka. Kakav je to čovjek kada je tako strašno završio? Kakvo zlo je morao počiniti da bi ga Bog poslao u pakao?

Isusov opis bogataša nam otkriva da je bio veoma bogat. Oblačio se u grimiz i lan i svaki dan sjajno gostio. Danas bismo ga opisali kao nekoga ko se oblači u najskupljim buticima, hrani u najboljim restoranima i vozi u Rols rojsu. Šta još možemo naučiti o njemu? Razmislimo o njegovoj moralnoj strani. Isus o njemu ne govori kao o ubojici, bludniku, razbojniku ili kakvom ratnom zločincu. Čovjek se na prvi pogled doima čestit i moralan. Vidimo i njegovu brigu za obitelj. Ima petero braće i boji se da oni ne dođu u isto mjesto muka. To mu daje veliki plus u našim očima. Abrahamu naziva ocem i zna za Mojsija i proroke što pokazuje da je najvjerovatnije bio Židov, odnosno pripadnik Božjeg izabranog naroda. Da se pretpostavi da je bio religiozan odnosno da je subotom išao u sinagogu i u hramu prinosio žrtve. To je u ono vrijeme bilo popularno kao što je danas

popularno ići u crkvu ili džamiju. U sinagoge i u hram su odlazili najugledniji ljudi, farizeji, književnici i svećenici, pa je i on sigurno želio da bude viđen u dobrom društvu.

Za bogataša možemo reći da je uspio u životu. Ko ne bi htio biti kao on? Ali otkriva se i jedan njegov problemčić, nije se mnogo obazirao na jadnog Lazara koji je ležao ispred njegovih vrata.

Pred sobom, dakle, imamo uglednog bogatog čovjeka koji uživa u životu i u mnogo čemu nam može biti primjer. Isus govori i o njegovoj smrti. Kaže da je nakon smrti bio pokopan. Ovim se vjerovatno želi reći da je imao dobru sahranu. Mnogo ljudi je bilo na sahrani i svećenik je dugo govorio. Kakav divan život i kakva divna sahrana. Šta bolje poželjeti?

ALI! Smrt nije kraj. Nakon smrti čovjek je otišao direktno u pakao, mjesto strašnih muka. Na zemlji je uživao pedeset ili sto godina, ali sada se muči za čitavu vječnost. Zapamtite da su pred nama riječi Gospodina Isusa Krista. Isus kaže da je čovjek otišao u pakao i da se tamo strašno muči. Zar je moguće da ovaj dobri i ugledni bogataš ode u pakao? Zašto je otišao u pakao? Zar nije mogao ići u raj?

On u pakao nije otišao zato što je bio bogat i što se oblačio u grimiz i lan, ili što se sjajno gostio, ili što je zanemario sirotog Lazara. Ne. Mnogi bogataši su u raju, a ne u paklu. Sjetimo se Salomona, Joba, Davida, Nehemije i drugih Božjih ljudi. Pakao nije za bogataše. Naš Dives nije otišao u pakao zato što je bio bogat. Tekst jasno kaže da je u pakao otišao jer je bio nevjernik odnosno nije bio obraćen. To vidimo iz njegovih riječi upućenih Abrahamu:

Nato će bogataš: 'Molim te onda, oče, pošalji Lazara u kuću oca moga. Imam petero braće pa neka im posvjedoči da i oni ne dođu u ovo mjesto muka.' Kaže Abraham: 'Imaju Mojsija i Proroke! Njih neka poslušaju!' A on će: 'O ne, oče Abrahame! Nego dođe li tko od mrtvih k njima, obratit će se.' Reče mu: 'Ako ne slušaju Mojsija i Proroka, neće povjerovati sve da i od mrtvih tko ustane.' (Lk 16:19-31)

Bogataš je svjestan da će i njegova braća u pakao. Zašto? Jer ne slušaju Mojsija i proroke, ne vjeruju, nisu se obratili. To je razlog zašto je on u paklu. Nije slušao Božju riječ, nije joj vjerovao i obratio se.

Kakva katastrofa! Isusovi slušatelji su vjerovatno bili šokirani. Možda su shvatili kako u pakao neće samo carinici i bludnici već postoji velika šansa da i oni sami tamo završe.

Jesmo li mi iznenađeni Isusovom pričom? Možda smo mislili da je s nama sve uredu? Mi smo pravi vjernici od rođenja. Kršteni smo kao male bebe, krizmani, pričešćeni. Iz dobre smo obitelji. Završili smo srednju školu ili fakultet. Imamo dobar posao i dobru plaću. Nikoga nismo ubili, nikoga silovali. Ponekad udijelimo pola marke prosjaku. Je li to dovoljno za ulazak u raj?

Ja bih rekao da je bogataš možda bio i bolji od toga, ali je opet otišao u pakao. Zar nije vrijeme da ozbiljnije razmisliš o svojoj vječnoj sudbini? Kako se ti odnosiš prema Mojsiju i prorocima? Znaš li šta piše u Bibliji? Da li stvarno vjeruješ u Boga? Jesi li se ikada istinski pokajao i obratio i primio Isusa Krista za svoga Gospodara i Spasitelja?

4. Lik Lazara

Razmislimo malo i o Lazaru. Isus ga spominje po imenu. Živio je jadnim životom. Siromah, prosjak, bolesnik. Šta bi ti izabrao, da si Dives ili Lazar? Šta bi više volio za svoje dijete, da je kao bogataš ili kao Lazar?

Lazar se u životu namučio zbog bolesti i siromaštva. Međutim, njegova smrt mijenja stvari. Za njega ne piše da je imao pokop, ali piše da su ga anđeli odnijeli u krilo Abrahamovo. Krilo Abrahamovo nije ništa drugo nego raj. To najvjerovatnije označava i počasno mjesto u raju, počasno mjesto za stolom u Kraljevstvu nebeskom. U ono vrijeme u Izraelu se nije sjedilo za stolom nego su ljudi ležali oslonjeni na lijevi lakat. Počasno mjesto je bilo u krilu domaćina, odnosno na ležaljci s njegove desne strane. Mi bismo danas rekli: na

stolici s domaćinove desne strane. Abraham je jedna od najvećih ličnosti izraelske i ljudske povijesti. Siroti Lazar u Kraljevstvu nebeskom sjedi njemu s desne strane. Na zemlji je bio niko i ništa, obični prosjak, a u nebu je važna ličnost.

Lazar u raj nije otišao zato što je bio siromašan i bolestan. Mnogi siromasi su danas u paklu. Otišao je zato što je slušao Mojsija i proroke, što se pokajao za svoje grijehе i obratio Bogu po vjeri u Isusa Krista kojega su propovijedali Mojsije i proroci.

5. Raj i pakao ili čistilište i reinkarnacija?

Razmislimo pomnije o raju, mjestu blaženstva, i paklu, mjestu mučenja. Nakon smrti čovjek završava na jednom od ovih mjesta. Neki kažu: *Nakon smrti ću u grob i pojest će me crvi.* Ne, nakon smrti ćeš u raj ili u pakao. Drugi kažu: *Ja ću se reinkarnirati.* Ne, nakon smrti ćeš u raj ili u pakao. Treći kažu: *Ja ću u čistilište.* Ne, nakon smrti ćeš u raj ili pakao.

Nema reinkarnacije, nema čistilišta. Učenja o reinkarnaciji i čistilištu su obične bajke. Kod nas malo ko vjeruje u reinkarnaciju, ali mnogi vjeruju u čistilište. Šta Isus kaže o čistilištu? Isus ne spominje nikakvo čistilište. Nigdje u Bibliji nema čistilišta. Postoje samo raj i pakao. Pogledajmo šta kaže Abraham:

K tome između nas i vas zjapi provalija golema te koji bi i htjeli prijeći odavde k vama, ne mogu, a ni odatle k nama prijelaza nema.

Između raja i pakla je golema provalija. Nema prelaza između raja i pakla, a čistilište se ne spominje. Ako bi postojalo čistilište i ako bi neko trebao ići u njega, onda bi to bio ovaj bogataš. On je bio prilično dobar čovjek i ako ne bi mogao direktno u raj, onda bi mogao barem u čistilište. Ili bi nakon sto godina u paklu mogao prijeći u čistilište, a nakon petsto godina u čistilištu u raj. Ali čistilište ne postoji. Između raja i pakla je golema provalija i nema nikakvih mogućnosti za prelaz. Vrijedi li se onda moliti za ovog bogataša? Ne, niti njemu, niti bilo kome drugom ko je u paklu nema

izlaska za čitavu vječnost. Zar to nije jasno učenje ovog teksta? Zar to nije jasno učenje Biblije?

Ako u Bibliji nema čistilišta i ako postoje samo raj i pakao zašto onda neki uče suprotno? Zašto naučavaju da nema pakla? To nas ne treba čuditi. Mnogi naučavaju da nema Boga, ali Boga ima. Mene ne zanima šta ljudi naučavaju nego šta Bog kaže. Bog kaže ono što piše u Bibliji, a u Bibliji postoji pakao, a ne postoji čistilište. Možeš vjerovati po svojoj volji, ali ja te pozivam da vjeruješ Bogu.

Bogataš je mogao vjerovati šta je god htio, ali to nimalo ne ublažava njegove muke. Mogao je vjerovati da nema pakla. Mogao je vjerovati u čistilište. Mogao je vjerovati u reinkarnaciju. Mogao je izmisliti neku svoju vjeru, ali je svejedno u paklu usred strašnih muka i tamo će ostati zauvijek jer iz pakla nema izlaza. Krajnje je vrijeme da odbacimo zbunjenost koju smo imali u vezi ove teme i ozbiljno se zapitamo: *Kako izbjeći pakao?*

6. Kako izbjeći pakao?

Na ovo pitanje sam već usputno odgovorio, ali sada ćemo se na njemu zadržati jer je to najvažnije pitanje u životu. Neki misle da je najvažnije da završe dobru školu, nađu dobar posao, da se ožene i imaju djecu, da zarade dobru penziju. Najvažnije je da imaju para i da su zdravi, da su popularni i ugledni. Ali to je sve sporedno. Najvažnije je da li ćeš nakon smrti u raj ili u pakao. Znaš li gdje ćeš? Znaš li kako izbjeći pakao?

Jedan od najkatastrofalnijih momenata u Isusovoj priči je taj što je bogataš znao kako da izbjegne pakao, ali to znanje nije iskoristio. To je jasno iz njegovog razgovora s Abrahamom. On želi pomoći svojoj braći da i oni ne odu u pakao. Šta kaže da trebaju učiniti?

Nato će bogataš: 'Molim te onda, oče, pošalji Lazara u kuću oca moga. Imam petero braće pa neka im posvjedoči da i oni ne dođu u ovo mjesto muka.' Kaže Abraham: 'Imaju Mojsija i Proroke! Njih neka poslušaju!' A on će: 'O ne, oče Abrahame! Nego dođe li tko od mrtvih k njima, obratit će se.' Reče mu: 'Ako ne slušaju Mojsija i

Proroka, neće povjerovati sve da i od mrtvih tko ustane.' (Lk 16:19-31)

Bogataš zna da je obraćenje jedini način da čovjek izbjegne pakao jer kaže: *Dođe li tko od mrtvih k njima, obratit će se.*

Kakvo obraćenje? Šta je to obraćenje? To je isto obraćenje o kojem su govorili Mojsije i proroci. Obraćanje po vjeri u Isusa Krista. Mojsije i proroci su govorili o Kristu koji ima doći i umrijeti na križu za naše grijeha. Oni su svjedočili da je u njemu oproštenje grijeha i spasenje. Evo šta kaže Filip u Novom zavjetu:

Filip nađe Natanaela i javi mu: Našli smo onoga o kome je pisao Mojsije u Zakonu i Proroci: Isusa, sina Josipova, iz Nazareta. (Iv 1:45)

Isus je rekao:

Ne mislite da ću vas ja tužiti Ocu. Vaš je tužitelj Mojsije u koga se uzdate. Uistinu, kad biste vjerovali Mojsiju, i meni biste vjerovali: ta o meni je on pisao. (Iv 5:45-46)

Apostol Petar jasno kaže kako su proroci svjedočili da je u Isusu Kristu oproštenje grijeha, a time i spasenje od pakla.

Za nj svjedoče svi proroci: da tko god u nj vjeruje, po imenu njegovu prima oproštenje grijeha. (Dj 10:43)

Bogataš je znao kako su Mojsije i proroci svjedočili da je spasenje od pakla samo po vjeri u Isusa Krista. Bio je svjestan da to znaju i njegova braća, ali odbijaju okrenuti se od grijeha i pokoriti Isusu Kristu. Zato je htio da Lazar ustane od mrtvih misleći da ih može nagovoriti na obraćenje. Abraham pobija njegovu zabludu:

Kaže Abraham: 'Imaju Mojsija i Proroke! Njih neka poslušaju!' A on će: 'O ne, oče Abrahame! Nego dođe li tko od mrtvih k njima, obratit će se.' Reče mu: 'Ako ne slušaju Mojsija i Proroka, neće povjerovati sve da i od mrtvih tko ustane.'

Šta je s tobom? Vjeruješ li Mojsiju i prorocima ili čekaš da neko ustane od mrtvih? Vjeruješ li da je oproštenje grijeha i spasenje od pakla jedino u Isusu Kristu? Vjeruješ li da je on umro na križu i uskrsnuo kako bi tvoji grijesi mogli biti oprošteni?

Zaključak

Vidjeli smo da poslije smrti čovjek ide u raj ili u pakao. U pakao ide svakako, a u raj samo ako se pokajao i vjerom prihvatio Isusa Krista za svoga Gospodara i Spasitelja. Bogataš je dobro znao za ove istine, ali ih nije uzimao ozbiljno. Danas se nalazi u paklu strašno se mučeći.

Šta će biti s tobom? Ako želiš izbjeći pakao onda vjeruj u Krista. Odreci se dosadašnjeg načina života i pokušaja da sam sebe spasiš te zamoli Isusa da ti sve oprosti i spasi te. To mu možeš reći ovog trenutka jer je on svuda prisutan i čuje tvoju molitvu. Svojim riječima ga zamoli da te spasi od pakla i On će te uslišati.

Kod nas možete naručiti i druge slične knjige i brošure:

- 1. Ko je Isus Krist?** Brošura.
- 2. Kako pobijediti brige?** Brošura.
- 3. Izgubljeni ljudi.** Brošura.
- 4. Dodite Isusu.** Brošura.
- 5. Božiji sud.** Kako i kada će Bog suditi ljude? Kako izbjeći Božiju kaznu? Brošura.
- 6. Hedonizam.** Brošura.
- 7. Homoseksualizam: biblijski pogled na problem.** Brošura.
- 8. Duhovna obnova.** Brošura.
- 9. Gdje ide čovjek nakon smrti?** Brošura.
- 10. Obraćanje, vjera i nanovo rođenje.** Brošura koja objašnjava najvažnije biblijske istine.
- 11. Sotona i demoni.** Ko je sotona? Ko su demoni? Gdje su? Šta rade? Kako se sačuvati? Brošura.
- 12. Sveto Trojstvo.** Knjiga obrađuje učenje o Svetom Trojstvu. Pokazuje i dokazuje da je nauk o Svetom Trojstvu istinit.
- 13. Kako promijeniti život?** Lekcije o nanovo rođenju, brošura.
- 14. Nepogrešivost Biblije.** (Ima li u Bibliji grešaka i kontradikcija? Je li Biblija u skladu s naukom?)
- 15. Očenaš.** Knjiga koja sadrži tumačenja poznate biblijske molitve. Šta znače riječi „Sveti se ime tvoje“? Šta „Dođi kraljevstvo tvoje“? Odgovore potražite u ovoj knjizi.
- 16. Kako mogu biti spašen?** Brošura

*Proizvodnja i distribucija literature se financira vašim
dobrovoljnim prilozima.*

Narudžbe:

Email: info@kbcent.net

ili poštom:

Kršćanska baptistička crkva

Vilenička 1/3

72290 Novi Travnik